

Tut respect: Pretschs modests

Stans da bavrondas e spaisas

DA GION NUTEGN STGIER / ANR

■ Per l'organisaziun perfetga meritan er ils organisaturs dals Campiunadis mundials da skis ina medaglia dad aur. Quai vala er per tuts quels che mainan a Salastrains in stan nua ch'ils blers fans han chaschun da sa nutrì cun bavrondas e spaisas e quai per in pretsch ruschanaivel. Cun discurre da San Murezzan fan blers la punt tar in mund mundan, tar in lieu cun pretschs exagerads e tar in diever abusiv. Almain a Salastrains a l'arrivada e nua che mintga di sa movan millis e millis fans n'è quai betg il cas. Bainspert è crudà en egl a blers visitaders

dals Campiunadis mundials da skis. Cun esser l'atmosfera tar mintga victoria e tar mintga medaglia svizra grondiusa s'augmenta automaticamain il gust da far festa, da star en cumpagnia e quai anc ditg suenter mesanotg. I vegn consumà senza fin e strusch in che recloma dals preschs per tut las bavrondas e tut las spaisas.

Kebab, hamburgers da tsherv e raclette

La purschida culinara è fitg vasta ed en vendita vegnan diversas spaisas e bavrondas. Liongias stattan sa chapetscha sin la carta da spaisas e quai per in presch da sis ubain set francs, in pretsch ch'è oz normal



Cun esser ils pretschs fitg modests vegn er consumà pulit a Salastrains.



En vendita vegn er il vin dals Campiunadis mundials da skis.

FOTOS G. N. STGIER

dals Campiunadis mundials da skis che mintga consumaziun è pajabla e quai per in pretsch modest. Ils organisaturs ed ils ustiers che mainan a Salastrains in dals numerus stans cun da baiver e cun da mangiar en s'unids tar in pretsch unic per mintga product e cunzunt per in pretsch che merita tut respect. Quel aspect da far pretschs modests a l'arrivada saja stà pli che be ina obligaziun, menziuna Hugo Wetzel, il president dal comité d'organisaziun da San Murezzan 2017. Mintgin duai savair pajar sia consumaziun senza avair l'impressiun dad esser engianà.

Gentils e cun bler plaschair

En egl è già l'emprim di dals Campiunadis mundials da skis en l'Engiadin'Ota er crudà la gentilezza da mintgin che ha en ina furma ubain l'otra da far insatge cun l'occurrènza. Quai è uschia tar quels che mainan ils stans a Salastrains, però er tar ils autists dals bus da «shuttle», ils umens da la proteccziun civila, els ch'èn fitg curtesaivels. Er mintga schuldà è da buna luna e fa cun plaschair sia lavur. Uschia merita San Murezzan er ina medaglia dad aur per la gentilezza che na savess betg esser pli da cor.

I vegn consumà pulit

Ils success dals skiunzs e da las skiunzas da la Svizra han natiralmain er ina gronda influenza sin la consumaziun dals visitaders

tar ina festa. Las auas mineralas custan tshintg francs, exclus il deposit ch'è indispensabel cun cumprar ina buttiglia da pet. Per in mez liter vin alv èsi da pajar 22 francs, quai ch'è segir in pretsch modest. In uschenumnà «Kafi Luz» ubain in «Jägertee» ins survegn per in pretsch da sis francs. En differents territoris da skis dal Grischun ins paja per quellas duas bavrondas considerablamain dapli.

Intgins meters pli ensi auters pretschs

En la vischinanza da l'arrivada da las cursas sa chattan ils dus restaurants da luxus «Salastrains» e «Chesa Chantarella». Per mangiabains en quels dus bunas adressas e senza reservar n'èsi strusch pussaivel da sa laschar pupragnar cun spaisas finas e vins franzos, talians e svizzers. Buttiglias da vins sut 80 francs na cumpiglia la carta da vins strusch, er cun esser il giast da San Murezzan pront da pajar dapli per in bun vin. Ina «minestrone», quella custa 22 francs, è però ina buntad e la verdura na manca er betg. Las pizzas, quellas custan da 25 fin 70 francs, tut tenor quai che vegn mess sin ellas tiers il chaschiel, il schambun e schizunt caviar. Per in «filetto di manzo» ins paja alura spert 80 francs, dentant als giasts da quels dus restaurants da luxus na fa quai segir betg mal. Da menziunar è lura er ch'il servis è perfetg e fitg gentil.



Quai è l'ospitant da l'enoteca amez San Murezzan, da tuts numnà «Pavarotti».

FOTO G. N. STGIER

Visitar «Pavarotti» tutga tiers

San Murezzan ha ina enoteca singulara

DA GION NUTEGN STGIER / ANR

■ In local nua che mintgin sa chatta bain è l'enoteca «Pava Rotti» amez San Murezzan. Gentilezza, italianità, vins da buna qualitat e vitiers piculezzas ch'èn tipicas per l'Italia. Mintga visita tar «Pavarotti» daventa ina aventura. San Murezzan ha bunamain en mintga chantun in restaurant, ina bar, ina discoteca e lura er intginas vinotecas. Tiers tut quels locals datti er ina enoteca e quella sa numna «Pava Rotti». L'ospitant da quella ha sapientivamain tschernì quel num per ses local, savess el bunamain esser in schumellin dal chantadur Luciano Pavarotti, uschè ferm sumeglia el il star tenor talian ch'è mort avant diesch onns. Deny Mainente è ses num origin, ses giasts, ses amis e ses fans al numnan simplamain «Pavarotti».

L'enoteca è er ina butia da vin

En l'Italia è ina enoteca ina butia da vin pli elevada, là nua ch'igl è pussaivel da cumprar vins per in pretsch pli aut e tiers quels er products talians da buna qualitat, sco coppa, salam e da tuttas sorts «formaggio». En ina enoteca èsi er pussaiv

el da star en cumpagnia, giudair in bun magiel vin e sa laschar ir bain. Gist quai èn er aspects ch'èn d'attribuir a «Pavarotti» ed a ses collavuraturs, els ch'èn tuts gentils e da bun cor. Tar «Pavarotti» è vegl e giuven bainvegnì e mintgin ha l'impressiun dad esser quel giast che l'ospitant spigava gist. Gia cun entrar en l'enoteca sa mussan quel ambient empernaivel, quella italianità e lura er la cordialità dal patrun e da ses camariers e sias camarieras. Tuts èn da buna luna e sa legran da mintga singul giast, uschia che la saira daventa in mument plaschaivel.

Total 600 differents vins

Stgatlas da vin senza fin, buttiglias da vin en mintga chantun e mobiglia rusticala, uschia sa preschenta l'intern da l'enoteca «Pava Rotti» che sa chatta a la Piazza dal Mulin a San Murezzan. Veritabel han ins bunamain l'impressiun ch'èn l'enoteca saja in vair scumbigl, però gist quai fa il local anc bler pli simpatic. El haja en l'enoteca ed en ses tshaler var 600 differents vins, ha ditg «Pavarotti», sco ch'el vegn numnà da tuts ses giasts fidaivels. La gronda part dals vins sajan bain da quels da l'Italia, il pajais da Deny Mainente.

Vins da 40 francs fin 7000 francs

El sez baiva gugent in magiel vin e quai vins da tut il mund, punctuescha «Pavarotti». Il pli gugent haja el però vins da la Toscana, ha ditg il Talian. En quellas regions sa chattan viticulturs da la classa superiura e tar quels haja el fitg buns contacts, menziuna il patrun da l'enoteca «Pava Rotti». Dapi il 2005 è l'um da l'Italia patrun e possessur da l'enoteca amez San Murezzan. En ses sortiment ha «Pavarotti» ina colleccziun da vins da 40 francs fin 7000 francs.

Vins per la signuria

Tar «Pavarotti» èsi er pussaivel da cumprar ils vins e baiver quels a chasa. Da quella purschida fan cunzunt diever ils blers «butlers» che vegnan tar il Talian per cumprar ils megliers vins e la saira servir quels a la signuria en las numerusas villas al Suret. Bavi vegn tar «Pavarotti» cunzunt vin talian e tar quel tutgan er in «Tignanello» per in pretsch da 170 francs ubain in «Sassicaia» che custa 280 francs per buttiglia. Tar blers giasts da San Murezzan è il pretsch secundar, uschia che quels vins van sco paunets frestgs er cun esser «Pavarotti» in excellent ospitant-vendider.

■ FOTO DAL DI

Controllas rigurusas

(anr/gns) Cun esser ils Campiunadis mundials da skis ina occurrènza internaziunala e manada tras sut las directivas da la FIS èn las controllas rigurusas. En cumparaziun cun ina cursa da skis da la

Cuppa mundiala èn las controllas a San Murezzan per bler pli vesiblas cun esser avant mintga entrada umens da la Securitas, dal militar, ubain da la polizia. Senza in uschenumnà «badge» èsi strusch

pussaivel da far in zap a Salastrains ed er en vischnanca, dapertut nua che las FIS ha ses meetings e nua ch'ils blers sponsurs envidan lur clients tar apéros cun da tuttas piculezzas da mangiar.



Mintga di, da la damaun a la saira, stattan quels dus umens da la Securitas tar l'entrada dal center da medias en l'hotel Reine Victoria.

FOTO G. N. STGIER